



ԿՈՌՈՒՊՑԻԱՅԻ ԿԱՆԽԱՐԳԵԼՄԱՆ ՀԱՆՁՆԱԺՈՂՈՎ

ՎԻՎ/06/2025

Ո Ր Ո Շ ՈՒ Մ

ՎԱՐՉԱԿԱՆ ԻՐԱՎԱԽԱԽՏՄԱՆ ՎԵՐԱԲԵՐՅԱԼ ԳՈՐԾԻ ՎԱՐՈՒՅԹԸ ԿԱՐՃԵԼՈՒ ՄԱՍԻՆ

ք. Երևան

31 հունվարի 2025թ.

Կոռուպցիայի կանխարգելման հանձնաժողովը, կազմով՝ Մարիամ Գալստյանի (նիստը նախագահող), Արամայիս Փաշինյանի, Արմեն Մարությանի և Լիլիթ Ալեքսանյանի (այսուհետ՝ Հանձնաժողով) 2025 թվականի հունվարի 31-ին, քննելով «Հայոց համազգային շարժում» կուսակցության (այսուհետ՝ նաև Կուսակցություն) նախագահ (այսուհետ՝ նաև պաշտոնատար անձ) Արարատ Զուրաբյանի կողմից Վարչական իրավախախտումների վերաբերյալ օրենսգրքի (այսուհետ՝ Օրենսգիրք) 189.13-րդ հոդվածի 2-րդ մասով սահմանված առերևույթ իրավախախտում կատարելու արարքի հիման վրա հարուցված վարչական իրավախախտման վերաբերյալ ՎԻՎ/06/2025 գործը՝

Պ Ա Ր Զ Ե Ց

I. Վարչական իրավախախտումների վերաբերյալ գործի վարույթի նախապատմությունը

1.1 Հանձնաժողովը, իրականացնելով «Կոռուպցիայի կանխարգելման հանձնաժողովի մասին» օրենքի 23-րդ հոդվածի 1-ին մասի 9-րդ կետով վերապահված գործառույթը, «Կուսակցությունների մասին» սահմանադրական օրենքի 22-րդ հոդվածի 1-ին մասի 2-րդ կետով, ինչպես նաև 27-րդ հոդվածի 2-րդ, 3-րդ մասերով սահմանված պահանջների պահպանվածության ստուգման արդյունքում հայտնաբերել է, որ «Հայոց Համազգային շարժումը» կուսակցության 2023 թվականի ֆինանսական միջոցների աղբյուրների և ծախսերի, ինչպես նաև գույքի մասին տարեկան հաշվետվությունն

(այսուհետ՝ Հաշվետվություն) օրենքով սահմանված կարգով և ժամկետում Հանձնաժողով չի ներկայացվել և այն օրենքով սահմանված կարգով և ժամկետում չի հրապարակվել, ինչի համար Օրենսգրքի 189.13-րդ հոդվածի 1-ին մասի հիմքով, 2024 թվականի հոկտեմբերի 28-ին Կուսակցության պաշտոնատար անձի նկատմամբ կիրառվել է վարչական տույժ:

1.2 Կիրառված վարչական տույժի վերաբերյալ Կուսակցության պաշտոնատար անձը պատշաճ ծանուցվել է՝ Օրենսգրքի 283-րդ հոդվածով սահմանված կարգով: Մասնավորապես, Կուսակցության պաշտոնատար անձի նկատմամբ «Վարչական տույժ կիրառելու մասին» Հանձնաժողովի որոշումը տեղադրվել է Հայաստանի Հանրապետության հրապարակային ծանուցումների պաշտոնական ինտերնետային կայքում 2024 թվականի նոյեմբերի 14-ին, որից հետո վերջինս համարվել է պատշաճ ծանուցված որոշման մասին ծանուցումն ինտերնետային կայքում տեղադրելու օրվան հաջորդող հինգերորդ օրը, այսինքն՝ 2024 թվականի նոյեմբերի 19-ին:

1.3 2024 թվականի նոյեմբերի 19-ից հետո մեկ ամսվա ընթացքում, այսինքն՝ մինչև 2024 թվականի դեկտեմբերի 19-ը Կուսակցության կողմից իրավախախտումը կատարվել է կրկին, այսինքն՝ 2023 թվականի ընթացքում Կուսակցության ստացած և ծախսած միջոցների մասին հաշվետվությունը օրենքով սահմանված կարգով և ժամկետում Հանձնաժողով չի ներկայացվել կամ դա օրենքով սահմանված կարգով և ժամկետում չի հրապարակվել:

1.4 Նշված խախտման հայտնաբերմամբ պայմանավորված՝ Հանձնաժողովը 2025 թվականի հունվարի 9-ին կայացրել է որոշում՝ Օրենսգրքի 189.13-րդ հոդվածի 2-րդ մասի հիմքով վարչական իրավախախտան վերաբերյալ վարույթ հարուցելու մասին՝ 2023 թվականի հաշվետու տարվա ընթացքում կուսակցության ֆինանսական միջոցների աղբյուրների և ծախսերի, ինչպես նաև գույքի մասին հաշվետվությունը օրենքով սահմանված կարգով և ժամկետում չհրապարակելու հիմքով վարչական տույժի միջոցներ կիրառելուց հետո մեկ ամսվա ընթացքում նույն հաշվետվությունը օրենքով սահմանված կարգով և ժամկետում Հանձնաժողով չներկայացնելու կամ դա օրենքով սահմանված կարգով և ժամկետում չհրապարակելու հիմքով:

1.5 Հանձնաժողովը 09.01.2025 թվականի թիվ 01/91-2025 գրությամբ Կուսակցության նախագահ Արարատ Զուրաբյանին է ներկայացրել ծանուցում 2024 թվականի հոկտեմբերի 28-ին վարչական տույժի միջոցներ կիրառելուց հետո՝ մեկ ամսվա ընթացքում Տարեկան հաշվետվությունը սահմանված կարգով և ժամկետում Հանձնաժողով չներկայացնելու և դա օրենքով սահմանված կարգով և ժամկետում չհրապարակելու առերևույթ խախտման վերաբերյալ՝ ծանուցումը ստանալուն հաջորդող աշխատանքային օրը՝ ժամը 15:00-ին հրավիրելով վերջինիս Հանձնաժողով մասնակցելու Օրենսգրքի 189.13-րդ հոդվածի 2-րդ մասով նախատեսված վարչական իրավախախտման հատկանիշներով վարչական իրավախախտման վերաբերյալ արձանագրություն կազմելու, իսկ ծանուցումը ստանալուն հաջորդող 3-րդ աշխատանքային օրը՝ ժամը 15:00-ին՝ առերևույթ իրավախախտման հիմքով կազմված արձանագրության և վերաբերելի նյութերի հիման վրա վարչական իրավախախտման վերաբերյալ գործի քննությանը մասնակցելու: Ծանուցումն ուղարկելուց հետո երկշաբաթյա ժամկետում Հանձնաժողովում առկա չէր Արարատ Զուրաբյանի կողմից գործի քննության տեղի և ժամանակի մասին պատշաճ ծանուցված լինելը հավաստող ապացույց (փոստային ծանուցագիրը ստացած լինելը հավաստող փոստային հետադարձ առաքանին):

1.6 Հաշվի առնելով վերոգրյալը Հանձնաժողովի կողմից 2025 թվականի հունվարի 23-ի թիվ 01/321-2025 գրությամբ՝ նշված ծանուցումը «Վարչարարության հիմունքների և վարչական վարույթի մասին» օրենքի 29.1-ին հոդվածի 14-15-րդ մասերի հիմքով ուղարկվել է վարույթի մասնակցի վերջին հայտնի բնակության վայրի համապատասխան համայնքի ղեկավարին և տեղադրվել է Հայաստանի Հանրապետության հրապարակային ծանուցումների պաշտոնական ինտերնետային կայքում (հրապարակային ծանուցման նույնականացման համար՝ 1609321): Սույն գործողությունները կատարելուց հետո՝ հինգերորդ օրը ծանուցումն օրենքով սահմանված կարգով համարվել է հանձնված (ստացված):

1.7 2025 թվականի հունվարի 29-ին պատշաճ ծանուցված Կուսակցության նախագահ Արարատ Զուրաբյանի բացակայությամբ կազմվել է թիվ ՎԻՎ/05/2025

արձանագրությունը՝ Օրենսգրքի 189.13-րդ հոդվածի 2-րդ մասով նախատեսված իրավախախտման հատկանիշներով:

1.8 Վարչական իրավախախտման վերաբերյալ գործի քննության տեղի և ժամանակի մասին պատշաճ ծանուցված Արարատ Ջուրաբյանի բացակայությամբ 2025 թվականի հունվարի 31-ին՝ ժամը 15:00-ին տեղի է ունեցել վարչական իրավախախտման վերաբերյալ գործի քննություն:

1.9 Վարչական իրավախախտման վերաբերյալ գործի քննության օրը Կուսակցության կողմից Հանձնաժողով են ներկայացվել ինչպես 2023 թվականի, այնպես էլ 2022 և 2024 թվականների ֆինանսական միջոցների աղբյուրների և ծախսերի, ինչպես նաև գույքի մասին տարեկան հաշվետվությունները:

II. Վարույթի մասնակցի ներկայացրած դիրքորոշում ու պարզաբանումներ

2.1 Սույն վարույթի շրջանակներում վարույթի մասնակցի կողմից դիրքորոշում և պարզաբանումներ չեն ներկայացվել:

III. Գործի քննության ընթացքում հաստատված հանգամանքները

Հանձնաժողովն ուսումնասիրել է թիվ ՎԻՎ/06/2025 գործում առկա նյութերը, կատարել հանգամանքների քննություն, որի արդյունքում հաստատված է համարում.

3.1 Հանձնաժողովի կողմից 2024 թվականի հոկտեմբերի 28-ին ընդունվել է «Վարչական տույժ կիրառելու մասին» թիվ ՎԻՎ/321/2024 որոշումը՝ Կուսակցության պաշտոնատար անձ Արարատ Ջուրաբյանի նկատմամբ, որի վերաբերյալ վերջինս համարվել է պատշաճ ծանուցված 2024 թվականի նոյեմբերի 19-ին:

3.2 2024 թվականի դեկտեմբերի 19-ի դրությամբ Արարատ Ջուրաբյանի կողմից Հաշվետվությունը Հանձնաժողով չի ներկայացվել, կամ դա օրենքով սահմանված կարգով և ժամկետում չի հրապարակվել:

3.3 Կուսակցության նախագահ Արարատ Ջուրաբյանը Հանձնաժողովի կողմից վարչական իրավախախտումների վերաբերյալ օրենսգրքի 189.13-րդ հոդվածի 1-ին մասի հիման վրա վարչական տույժ կիրառելուց հետո մեկ ամսվա ընթացքում կատարել է նույն

խախտումը՝ Տարեկան հաշվետվությունը օրենքով սահմանված կարգով և ժամկետում չի ներկայացրել Հանձնաժողով և դա օրենքով սահմանված կարգով և ժամկետում չի հրապարակել:

3.4 Արդարադատության նախարարության իրավաբանական անձանց պետական ռեգիստրի գործակալության գրանցամատյանում առկա տեղեկատվության համաձայն՝ Արարատ Զուրաբյանը հանդիսանում է Կուսակցության գործադիր մարմնի ղեկավարը՝ նախագահը:

3.5 Հանձնաժողովի կողմից նախկինում՝ 2024 թվականի հունվարի 24-ին կրկին կիրառվել է վարչական տույժ Արարատ Զուրաբյանի նկատմամբ՝ 2021 և 2022 թվականների ընթացքում Կուսակցության ստացած և ծախսած միջոցների մասին տարեկան հաշվետվությունները և դրանց հրապարակման փաստը վկայող ապացույցները սահմանված ժամկետում Հանձնաժողով չ'ներկայացնելու հիմքով:

3.6 Արարատ Զուրաբյանի կողմից Տարեկան հաշվետվությունն օրենքով սահմանված կարգով և ժամկետում Հանձնաժողով չի ներկայացվել և դա օրենքով սահմանված կարգով և ժամկետում չի հրապարակվել:

3.7 Մինչև վարչական իրավախախտման վերաբերյալ նշանակված գործի քննության օրը Կուսակցության կողմից ներկայացվել է Տարեկան հաշվետվությունը:

Որոշումն ընդունելու իրավական հիմքերը և հիմնավորումները

4.1 «Կուսակցությունների մասին» սահմանադրական օրենքի 22-րդ հոդվածի 1-ին մասի 2-րդ կետի համաձայն՝ կուսակցությունը պարտավոր է յուրաքանչյուր տարի Հայաստանի Հանրապետության հրապարակային ծանուցումների պաշտոնական ինտերնետային կայքում՝ <http://www.azdarar.am>, հրապարակել ֆինանսական միջոցների աղբյուրների և ծախսերի, ինչպես նաև գույքի վերաբերյալ հաշվետվությունը:

4.2 «Կուսակցությունների մասին» սահմանադրական օրենքի 27-րդ հոդվածի 2-րդ մասի համաձայն՝ Կուսակցությունը պարտավոր է յուրաքանչյուր տարի՝ հաշվետու տարվան հաջորդող **մայիսի 31-ից ոչ ուշ**, Հայաստանի Հանրապետության հրապարակային

ծանուցումների պաշտոնական ինտերնետային կայքում հրապարակել հաշվետու տարվա ընթացքում կուսակցության ֆինանսական միջոցների աղբյուրների և ծախսերի, ինչպես նաև գույքի մասին հաշվետվությունը:

4.3 «Կուսակցությունների մասին» սահմանադրական օրենքի 27-րդ հոդվածի 3-րդ մասի համաձայն՝ Կուսակցությունն իր հաշվետվությունը Հայաստանի Հանրապետության հրապարակային ծանուցումների պաշտոնական ինտերնետային կայքում հրապարակելուց հետո՝ եռօրյա ժամկետում, պարտավոր է հաշվետվությունը և դրա հրապարակման փաստը վկայող ապացույցը ներկայացնել Հանձնաժողով:

4.4 «Կոռուպցիայի կանխարգելման հանձնաժողովի մասին» օրենքի 24-րդ հոդվածի 1-ին մասի 28-րդ կետի համաձայն՝ Հանձնաժողովը քննում և լուծում է կուսակցությունների ֆինանսական գործունեությանը և կուսակցությունների տարեկան հաշվետվություններին առնչվող խախտումների վերաբերյալ գործերը:

4.5 «Կոռուպցիայի կանխարգելման հանձնաժողովի մասին» օրենքի 26-րդ հոդվածի 1-ին մասի համաձայն՝ վարչական իրավախախտումների վերաբերյալ Հայաստանի Հանրապետության օրենսգրքով նախատեսված վարչական իրավախախտումների վերաբերյալ վարույթի հետ կապված հարաբերությունները կարգավորվում են Վարչական իրավախախտումների վերաբերյալ Հայաստանի Հանրապետության օրենսգրքով, ինչպես նաև «Վարչարարության հիմունքների և վարչական վարույթի մասին» Հայաստանի Հանրապետության օրենքով՝ հաշվի առնելով սույն օրենքով սահմանված առանձնահատկությունները:

4.6 Օրենսգրքի 14-րդ հոդվածի համաձայն՝ պաշտոնատար անձինք ենթակա են վարչական պատասխանատվության այնպիսի վարչական իրավախախտումների համար, որոնք կապված են կառավարման կարգի, պետական ու հասարակական կարգի, բնության, բնակչության առողջության պահպանության ոլորտում սահմանված կանոնները և մյուս այն կանոնները չպահպանելու հետ, որոնց կատարման ապահովումը մտնում է նրանց պաշտոնեական պարտականությունների մեջ: Սույն օրենսգրքի իմաստով՝ կուսակցության պաշտոնատար անձ է համարվում կուսակցության կանոնադրության կամ այլ փաստաթղթերի հիմքով՝ սույն օրենսգրքով պատասխանատվություն առաջացնող

գործողությունների (անգործության) համար պատասխանատու կուսակցության ղեկավար մարմնի անդամը կամ կուսակցության՝ կազմակերպական-տնօրինչական, վարչատնտեսական գործառույթներ իրականացնող պատասխանատու անդամը կամ աշխատողը:

4.7 «Վարչարարության հիմունքների և վարչական վարույթի մասին» ՀՀ օրենքի 29.1 հոդվածի 14-րդ մասի համաձայն՝ եթե անձը հրաժարվել է ստանալ փոստային առաքանին, կամ կողմի նշած հասցեով ուղարկված փոստային առաքանին վերադարձվել է, կամ պատվիրված նամակով ուղարկվելու դեպքում ուղարկվելու օրվանից հետո՝ երկշաբաթյա ժամկետում, վարչական մարմինը չի ստացել հետադարձ ծանուցումը (ծանուցման մասին անդորրագիրը), կամ վարչական վարույթի մասնակցի հասցեն անհայտ է, ապա ծանուցումն ուղարկվում է՝ աշխատանքի վայրի հասցեով (վարչական վարույթի նյութերում դրա առկայության դեպքում) և անձի վերջին հայտնի բնակության վայրի համապատասխան համայնքի կամ վարչական շրջանի ղեկավարին (բացառությամբ այն դեպքերի, երբ վարչական վարույթը հարուցվել է համայնքի կողմից), իսկ վարչական վարույթում ֆիզիկական անձի այլ հասցեների, այդ թվում՝ էլեկտրոնային փոստի վերաբերյալ տվյալների առկայության դեպքում՝ այդ հասցեներով:

Նույն հոդվածի 15-րդ մասի համաձայն՝ սույն հոդվածի 14-րդ մասով սահմանված գործողությունները կատարելու հետ միաժամանակ ծանուցումը տեղադրվում է Հայաստանի Հանրապետության հրապարակային ծանուցումների պաշտոնական ինտերնետային կայքում: Սույն մասով նախատեսված գործողությունները կատարելուց հետո՝ հինգերորդ օրը, համապատասխան ծանուցումները համարվում են հանձնված (ստացված):

4.8 «Վարչարարության հիմունքների և վարչական վարույթի մասին» օրենքի 37-րդ հոդվածի 1-ին մասի համաձայն՝ վարչական մարմինը պարտավոր է ապահովել փաստական հանգամանքների բազմակողմանի, լրիվ և օբյեկտիվ քննարկումը՝ բացահայտելով գործի բոլոր, այդ թվում՝ վարույթի մասնակիցների օգտին առկա հանգամանքները:

4.9 Օրենսգրքի 252-րդ հոդվածի համաձայն՝ մարմինը ապացույցները գնահատում է իր ներքին համոզմունքով, որը հիմնված է գործի՝ իրենց ամբողջությամբ վերցված բոլոր

հանգամանքների համակողմանի, լրիվ և օբյեկտիվ հետազոտման վրա, ղեկավարվելով օրենքով և իրավագիտակցությամբ:

4.10 Օրենսգրքի 244.17-րդ հոդվածի համաձայն՝ Օրենսգրքի 189.13-րդ հոդվածով նախատեսված վարչական իրավախախտումների վերաբերյալ գործերը քննում և վարչական տույժեր է նշանակում Հանձնաժողովը:

4.11 «Կոռուպցիայի կանխարգելման հանձնաժողովի մասին» օրենքի 26-րդ հոդվածի 3-րդ մասի համաձայն՝ Հանձնաժողովը Վարչական իրավախախտումների վերաբերյալ Հայաստանի Հանրապետության օրենսգրքով նախատեսված վարչական իրավախախտումների վերաբերյալ վարույթի արդյունքում ընդունում է որոշումներ, որոնք կարող են բողոքարկվել «Վարչարարության հիմունքների և վարչական վարույթի մասին» Հայաստանի Հանրապետության օրենքին համապատասխան՝ դատական կարգով:

4.12 Օրենսգրքի 282-րդ հոդվածի համաձայն՝ քննելով վարչական իրավախախտման վերաբերյալ գործը, մարմինը (պաշտոնատար անձը) ընդունում է հետևյալ որոշումներից մեկը՝ 1) վարչական տույժ նշանակելու մասին, 2) գործի վարույթը կարճելու մասին: Գործի վարույթը կարճելու մասին որոշում ընդունվում է նաև բանավոր դիտողություն հայտարարելու դեպքում:

4.13 Օրենսգրքի 189.13-րդ հոդվածի 1-ին մասի համաձայն՝ հաշվետու տարվա ընթացքում կուսակցության ստացած և ծախսած միջոցների մասին հաշվետվությունը օրենքով սահմանված կարգով և ժամկետում լիազոր մարմին չներկայացնելը կամ դա օրենքով սահմանված կարգով և ժամկետում չիրապարակելը՝ առաջացնում է տուգանքի նշանակում կուսակցության պաշտոնատար անձանց նկատմամբ՝ սահմանված նվազագույն աշխատավարձի քառասնապատիկից մինչև հիսնապատիկի չափով:

4.14 Նույն հոդվածի 2-րդ մասի համաձայն՝ նույն խախտումը, որը կատարվել է կրկին վարչական տույժի միջոցներ կիրառելուց հետո՝ մեկ ամսվա ընթացքում՝ առաջացնում է տուգանքի նշանակում՝ սահմանված նվազագույն աշխատավարձի չորսհարյուրհիսնապատիկից մինչև հինգհարյուրապատիկի չափով:

4.15 «Կուսակցությունների մասին» սահմանադրական օրենքի 32-րդ հոդվածի 1-ին մասի 1-ին կետի համաձայն՝ Կուսակցության գործունեությունը կարող է կասեցվել, եթե կուսակցությունը՝ իր գործունեության ընթացքում թույլ է տվել օրենքի կոպիտ խախտում:

4.16 Նույն հոդվածի 2-րդ մասի 1-ին կետի համաձայն՝ սույն հոդվածի 1-ին մասի իմաստով՝ օրենքի կոպիտ խախտում են համարվում կուսակցության կողմից օրենքով չթույլատրված կամ օրենքով սահմանված չափը գերազանցող նվիրատվությունները օրենքով սահմանված ժամկետում պետական բյուջե կամ նվիրատուին փոխանցելու **կամ կուսակցության տարեկան հաշվետվությունն օրենքով սահմանված ժամկետում և կարգով հրապարակելու կամ պետական լիազոր մարմին ներկայացնելու կամ օրենքով սահմանված՝ տարեկան հաշվետվության ստուգման համար անհրաժեշտ փաստաթղթերը Կոռուպցիայի կանխարգելման հանձնաժողովին տրամադրելու օրենքով սահմանված կարգը դիտավորությամբ խախտելը և Հայաստանի Հանրապետության օրենսդրությամբ նախատեսված կարգով պատասխանատվության ենթարկվելուց և Կոռուպցիայի կանխարգելման հանձնաժողովի կողմից կուսակցության գործունեությունը կասեցնելու հնարավորության վերաբերյալ գրավոր նախազգուշացվելուց հետո՝ երեսնօրյա ժամկետում, խախտումը չվերացնելը:**

4.17 Նույն հոդվածի 5-րդ մասի համաձայն՝ Վարչական պատասխանատվության ենթարկելուց հետո՝ երեսնօրյա ժամկետում, խախտումը չվերացնելու դեպքում Կոռուպցիայի կանխարգելման հանձնաժողովը այդ մասին անհապաղ տեղեկացնում է Հայաստանի Հանրապետության Ազգային ժողովին և Հայաստանի Հանրապետության կառավարությանը:

Սույն գործով հաստատված փաստական հանգամանքների նկատմամբ կիրառելի իրավական նորմերի վերլուծության արդյունքում Հանձնաժողովն արձանագրում է.

«Հայոց համազգային շարժում» կուսակցության նախագահ Արարատ Զուրաբյանի կողմից թույլ է տրվել Օրենսգրքի 189.13-րդ հոդվածի 2-րդ մասի խախտում, այն է՝ Հանձնաժողովի կողմից Վարչական իրավախախտումների վերաբերյալ օրենսգրքի 189.13-րդ հոդվածի 1-ին մասի հիմքով վարչական տույժ կիրառելուց հետո մեկ ամսվա ընթացքում

կատարվել է նույն խախտումը՝ Տարեկան հաշվետվությունը օրենքով սահմանված կարգով և ժամկետում Հանձնաժողով չներկայացնելով և դա օրենքով սահմանված կարգով և ժամկետում չհրապարակելով:

Միաժամանակ, Հանձնաժողովը հարկ է համարում անդրադառնալ Վարչական իրավախախտումների վերաբերյալ Օրենսգրքի 21-րդ հոդվածին, որով սահմանված է, որ եթե կատարված վարչական իրավախախտումը նվազ նշանակություն ունի, գործը վճռելու համար լիազորված մարմինը (պաշտոնատար անձը) կարող է խախտողին ազատել վարչական պատասխանատվությունից և բավարարվել բանավոր դիտողությամբ:

Արարքի նվազ նշանակությունը գնահատելիս անհրաժեշտ է հաշվի առնել այն հանգամանքը, որ թեև ձևականորեն արարքը կարող է պարունակել Վարչական իրավախախտումների վերաբերյալ ՀՀ օրենսգրքով սահմանված արարքի հատկանիշներ, սակայն ֆիզիկական կամ իրավաբանական անձին, հասարակությանը, պետությանը այնպիսի էական վնաս չի պատճառվել, որի հիմքով սահմանված պատասխանատվությունը դիտարկվի համաչափ:

Նվազ նշանակությունը կիրառելիս անհրաժեշտ է հաշվի առնել խախտման բնույթը, դրա որակական կողմը, ինչպես նաև խախտում թույլ տված անձի վերաբերմունքը խախտման նկատմամբ:

Հանձնաժողովն արձանագրում է, որ Օրենսգրքի 189.13-րդ հոդվածի 2-րդ մասով նախատեսված դրույթը նպատակ է հետապնդում ապահովել հաշվետու տարվա ընթացքում Կուսակցության ստացած և ծախսած միջոցների մասին հանրային հաշվետվողականությունը, կոռուպցիոն ռիսկերից զերծ գործունեությունը:

Խախտման հիմքով պատասխանատվություն սահմանելու հարցը որոշելու համար Հանձնաժողովը գտնում է, որ անհրաժեշտ է յուրաքանչյուր գործով գնահատել, թե արդյոք այդ խախտումը հանգեցրել է տվյալ նորմով պաշտպանվող իրավահարաբերությունների բուն էության խաթարմանը:

Տվյալ դեպքում, արարքը որպես նվազ նշանակություն որակելու տեսանկյունից Հանձնաժողովն էական է գնահատում հետևյալ հանգամանքների միաժամանակյա առկայությունը՝

1. Մինչև վարչական իրավախախտման վերաբերյալ գործի քննությունը Կուսակցության կողմից Հանձնաժողով է ներկայացվել է Տարեկան հաշվետվությունը:

2. Կուսակցության կողմից Հանձնաժողով են ներկայացվել ոչ միայն 2023 թվականի, այլև 2022 և 2024 թվականների՝ կուսակցության ֆինանսական միջոցների աղբյուրների և ծախսերի, ինչպես նաև գույքի մասին տարեկան հաշվետվությունները:

3. Ներկայացված հաշվետվությունների ուսումնասիրությունից պարզ է դարձել, որ ինչպես 2023 թվականի, այնպես էլ 2022 և 2024 թվականների ընթացքում Կուսակցությունը ընթացիկ ֆինանսական գործունեություն չի ծավալել:

Հաշվի առնելով վերոնշյալը, Հանձնաժողովն արձանագրում է, որ Կուսակցության կողմից վարչական իրավախախտման վերաբերյալ գործի քննության օրը Տարեկան հաշվետվությունը ներկայացնելու արդյունքում նշված նորմով պաշտպանվող իրավահարաբերությունների էությունը չի խաթարվել, քանի որ օրենսդրի կողմից նախանշված՝ Կուսակցության ստացած և ծախսած միջոցների, ինչպես նաև գույքի մասին տեղեկատվության ներկայացման, ասինքն՝ հանրային հաշվետվողականության նպատակն ապահովվել է, ընդ որում, ոչ միայն պահանջվող՝ 2023 թվականի տարեկան հաշվետվության ներկայացմամբ, այլև դրան նախորդող՝ 2022 թվականի, և հաջորդող՝ 2024 թվականի հաշվետվությունների ներկայացման փաստի ուժով:

Ինչ վերաբերում է օրենսդրի կողմից նախանշված հաջորդ՝ կոռուպցիոն ռիսկերից զերծ գործունեության պայմանն ապահովելու նպատակին, ապա հարկ է նշել, որ նշվածի համատեքստում Հանձնաժողովի համար էական է գնահատվել ինչպես 2023 թվականի, այնպես էլ 2022 և 2024 թվականների Կուսակցության հաշվետվությունների ուսումնասիրության արդյունքում արձանագրված փաստն առ այն, որ Կուսակցությունն ինչպես 2023 թվականին, այնպես էլ 2022 և 2024 թվականներին չի ծավալել որևէ ֆինանսական գործունեություն: Ամփոփելով ամբողջ վերոնշյալը, Հանձնաժողովն արձանագրում է, որ վերոնշյալ հանգամանքների միաժամանակյա առկայությամբ պայմանավորված՝ Կուսակցության կողմից Օրենսգրքի 189.13-րդ հոդվածի 2-րդ մասով սահմանված նորմի խախտման արդյունքում չի խաթարվել Օրենսդրի կողմից ամրագրված իրավահարաբերությունների հիմքում դրված նպատակի բուն էությունը, ինչով

պայմանավորված էլ Հանձնաժողովը գտնում է, որ Կուսակցության նախագահի կողմից կատարված վարչական իրավախախտումն ունի նվազ նշանակություն:

Ելնելով վերոգրյալից, ղեկավարվելով «Կոռուպցիայի կանխարգելման հանձնաժողովի մասին» օրենքի 22-րդ հոդվածի 1-ին մասի 2-րդ կետով, Վարչական իրավախախտումների վերաբերյալ օրենսգրքի 21-րդ հոդվածի 1-ին մասով, 282-րդ հոդվածի 2-րդ կետով և 283-րդ հոդվածով՝ Հանձնաժողովը.

Ո Ր Ո Շ Ե Ց

1. Արարատ Զուրաբյանին ազատել վարչական պատասխանատվությունից և հայտարարել բանավոր դիտողություն՝ կարճելով ՎԻՎ/06/2025 վարչական իրավախախտման վերաբերյալ գործի վարույթը:

2. Սույն որոշումն ուժի մեջ է մտնում Արարատ Զուրաբյանին այն սահմանված կարգով հանձնելու (հանձնված համարվելու) հաջորդող օրվանից:

3. Սույն որոշումը կարող է բողոքարկվել ՀՀ օրենսդրությամբ սահմանված կարգով և ժամկետում:

ՀԱՆՁՆԱԺՈՂՈՎԻ ՆԱԽԱԳԱՀԻ

ՊԱՐՏԱԿԱՆՈՒԹՅՈՒՆՆԵՐԸ ԿԱՏԱՐՈՂ՝

ՄԱՐԻԱՄ ԳԱԼՍՅԱՆ